

Vladislavus II. Poloniarum Rex.

Heidenstein (Joannes): Vladislavus II. Poloniarum  
et Sveciae Regi - ob domitos hostes - pro  
negotium dedicat gratulabundus. 1636.

PANEG. et VITAE

Polon. Fol.

Nº 1511.







VLADISLAO IV.  
POLONIAE ET  
SVECIÆ  
REGI.

MAGNO, FELICI, VICTORIOSO.

O B

DOMITOS, FRACTOS, SUBACTOS,  
FORTI DEXTRA, PRUDENTI CONSILIO,

HOSTES

QUI

SEPTENTRIONIS ET ORIENTIS  
VIRIBUS, OPIBUS, POTENTIA,  
EVERTERE

*POLONIAM SATAGEBANT.*

PANEGYRICUM

IOANNES HEIDENSTEIN  
SOLLESCIUS.

*DEDICAT, CONSECRAT, OFFERT*

GRATULABUNDUS.



ANNO CHRISTI M. DC. XXXVI.



MARCELLUS PALINGENIUS IN  
ZODIACO VITÆ.

**G**IGNIT AMOR PACEM; PAX EST DIGNISSIMA RERUM,  
Omnia pace vigent, & pacis tempore florent:  
Pacis summus honos, paci est quoque summa voluptas.  
Tunc tuti vivunt homines, tutusq; viator  
Carpit iter, nec fit sæuorum præda latronum:  
Tunc apium cura & pecoris, tunc arua coluntur  
Assiduè, & largas pariunt pro tempore fruges:  
Copia tunc Cereris, tunc lac, tunc Bacchus abundat;  
Palladiusque liquor: tunc passim luditur, & tunc  
In flata ad thyasos invita tibia. Soli  
Oderunt pacem stulti, & certamina quærunt.  
Talia fluxerunt Saturno tempora rege:  
O FOELIX ÆTAS, IPSO PRECIOSIOR AURO!

VLADIS-





# VLADISLAO IV. POLONIAE ET SVECIAE REGI.

POTENTISSIME, AC INVICTIS-  
SIME REX,



**P**OLONIAE totius letitia & tranquillitas me civem suum & Tuum; Tibi ad congratulandum, sibi ad congaudendum, excitavit. Cum enim viderem prostratos hostes, superatos adversarios, tutum ab incursionibus hostilibus Regnum, pacatam patriam; atque cunctos ob eam felicitatem exultantes; animus etiam meus gaudio effusus, Tuique beneficii, sui vero officii memor, in laudes Majestatis Tuae excurrere properavit. Equidem & patria fortuna, quam Tu ornasti tot victorijs, tot triumphis clariorem effecisti: & Tua in armis fortitudo, in rebus gerendis dexteritas, id ab omnibus requirunt, ut Tuum nomen ad aethera ferant. Ego ne inter ceteros solus taceam? Reipublicae salus, celebritas nominis Tui, militum strenuitas, qui Tuis auspicijs & ductu immortalem gloriam sibi pepererunt, meus denique in Rempub. in Majestatem Tuam, in concives meos affectus, & amor, aliud à me jure suo reposcunt. Quod denegare, impijs non prestare, ingrati animi foret inditum. Patriam enim non ornare cum possis; Principi pro summis beneficijs non referre gratiam, cum debeas; dementis potius, quam temerarij hominis est. Ornarunt Poloniam & doctrinâ, & arte militari, fortes prudentesq; viri plurimi; Tibi quoq; Principi suo, universi cives pro laboribus, quos eorum causâ, periculosissimis temporibus perpeffus es, publicè privatimque gratitudinem declararunt. Superest, ut illi etiam, quos aut casus fortuna huic, ut Tibi patriaeque gratularentur surripuit; aut temporis locique incommoditas officio subtraxit; in publica omnium ordinum exultatione Tua Majestati, atque Reipubl. Panegyricos triumphantes praesentent. Et meum quidem REX INCLITE, rudem ac aridum pro innata bonitate non respues. Atlantis fortasse opus aggressus sum, quem Poëta cælum humeris suis sustentare fingunt; cum Tuas divinas virtutes, levi scriptionis genere, prout ingenij & aetatis meae fert teneritas assequi conor; cum calamo calitus Tibi immixtas dotes efferre ac sustinere elaboro. Attamen stabilis permanebo, si Tua humanitas meam dictionis sterilitatem leniens accesserit; firmiter sub onere hoc consistam, si Tua benevolentiae radijs, obscuritatem sermonis mei illustraveris. Ea enim vera Regum gloria est, si subditorum suorum affectum aquo animo suscipiant, & potius imbecillitatem eorum, quam magnitudinem



itudinem suam respiciant ac considerent. Tua victoria ac trophæa, Tua in armis præstantia, Tuæ virtutes, præconem Demostheni, aut Pericli, qui dicendo tonare, fulgurare, permiscere Græciam visus est, similem efflagitant, meam verò tenuitatem rejiciunt. Verùm sicut avicula penes generosas aves, suam quoque habent commendationem, cum non magnitudine, aut pulchritudine, sed cantilenis & suavitate vocis cum majoribus certant: ita etiam ego inter disertos & facundos oratores, solus ubertate verborum, gravitate sententiarum destitutus, prodibo. Suscipe itaque REX MAGNE Panegyricum hunc, qui Moscum, Turcam, Suecum, hostes Tuos partim vi ad reverentiam nominis Tui redactos, partim prudentia mitigatos ac pacatos esse orbi demonstrabit: qui Tuas præclaras actiones extollet & prædicabit. Ostende hilaritate frontis Tuæ, ac benevolo vultu, neminem infelicitè sub Tuo regimine artes honestissimas tractare. Declarasti jam militem Tuo ductu vincere, & ad gloriam pervenire posse; declara etiam, studia nullibi tutius ac utilius domicilium, quam in POLONIA habere. Vive REX INVICTE & Regna longissimo & felicissimo tempore, ut Tuorum quoque annorum, & imperij incremento POLONIA illustretur. Datum SOLLENCINII Anno Domini 1636. die Mensis 20. Martij.

## MAJESTATIS TUÆ

Obsequentissimus subditus

JOANNES HEIDENSTEIN  
SOLLESCIUS.

PANEGY.



# VLADISLAO IV.

## POLONIAE ET SVECIAE REGI.

OB PACATOS, MOSCOS, TURCAS, SVECOS

AB IOANNE HEIDEN-  
STEIN SOLLESCIO.

DICATUS.



RATULABUNDUS ad Te tri-  
plici conspicuum ac redimitum  
laureâ REX MAGNE accedo. Mosco-  
rum enim perfidiam magnanimi-  
tate domuisti; Turcarum ferociam,  
fortitudine contrivisti; Suecorum  
pertinaciam, tempore mitigasti.  
Quæ victoriæ ac laureatæ coronæ, quo maiorem in a-  
nimishominum admirationem excitant, eo frequen-  
tiores applausus, & ferventiora vota universa POLO-  
NIA se Tibi debere, solenniter recognoscit. Nec sa-  
ne aliud vel ad nominis sui immortalitatem illustrius,  
vel ad propagandos terminos validius, vel ad ampli-  
ficandam imperij dignitatem præclarius, à Te expe-  
ctare potuit, quàm cum hostes illos fugares ac tolle-  
res, qui non modo Regnum tot sæculis celebre, ve-  
rum etiam nomen POLONUM tot nationum invida-  
rum, aures offendens interire ac radicitus extirpare  
exoptabant. Imminebant jam cervicibus nostris, im-  
minebant & fortunis, quos nisi pectore gazâque Tua  
à maioribus per manus Tibi tradita repulisses, & vita  
& bona nostra, uno ictu oculi in exitium fuissent præ-



cipitata. Atque sic unus pro omnibus vigilasti, ut cæteri securè somnum carperent; pectus Tuum opposuisti, ut alij incolumes permanerent; famem & sitim perpeffus es, ut cives abundarent, quod demum, verè regnare est. Qua in re non tam felicitatem nostram, quam immensi Dei, inæstimabilem bonitatem deprecāmur, quod Tibi gubernacula Regni hujus concesserit, qui hostium calliditatem prudentia, audaciam potentia, temeritatem constantia, scias & valeas reprimere ac infringere. Nam cū undiquaque atrocissimis circumsepti simus inimicis, hoc unicum anxie desiderabamus, ut talis singulari Dei beneficio Princeps nobis contingeret, qui & hostium terror, & civium propugnator existeret. Te ejusmodi Regem quoniam nacti sumus, qui desiderijs nostris abundè satisfacias, non prosequemur laudibus, non gratulationibus excipiemus? Si universa Christianitas Tuum nomen veneratur, si Orbis totus, ad tuam famam, exultans sese erigit, nos cives Tui, sensum nostrum non promemus? Quæ esset ista inhumanitas, quæ ingratitude; ejus heroica facinora reticere, qui humanitatis & gratianimi sui viva præbet omnibus documenta? Manent Te trophæa, applausus, acclamationes; & quod supra omnia est, Amor subditorum: quem quantumvis divis prædecessoribus Tuis, inviolatum semper servavimus ac demonstravimus; attamen hoc tempore, Tibi talem ob merita exhibemus, qualem ob reverentiam tantæ majestati debitam exhibere teneremur. Cū enim Tua pericula & assiduos labores diligenti cogitatione perpendimus, omnia nostra Tua sunt, qui unus omnium nostrum es. Quicquid laborasti, aut sudasti his formidolosis bellis, nobis acquisivisti, nobis congregasti;  
ita ta-



ita tamen, ut nos hæc omnia, non tam nobis, quàm  
Tuæ majestati esse acquisita putaremus ac vellemus.  
Contra hostes Tibi & nobis infensissimos, quoties  
progressus es, toties urbium expugnator, & regio-  
num potestati Tuæ subjectarum defensor appellatus,  
victoriarum aggregatione extitisti felicior. Hinc  
illæ faustæ congratulantium voces, hinc illa omni-  
um, ab imo pectore deducta suaviter suspiria, quæ  
cùm in ipsis præcordijs sese continere non possint,  
foras erumpunt, & tanti Regis facta justo enco-  
mio prosequi potius malunt, quàm ingrato silen-  
tio præterire. Nam facilius armatas hostium co-  
pias continere, quam exundantem lætitiâ animum  
cohibere queas, ne id quod sentit in aliorum co-  
gnitionem deducat. Naturam potius perfringas,  
quàm mentem immutes, quæ serena & placida,  
suorum Principum actiones, cum suavitate quadam  
sibi repræsentat. Hic animus, hæc mens **POLO-**  
**NORUM** est, ut Tibi pro tantis in Rempub. no-  
stram collatis beneficijs, debitos persolvant hono-  
res, debita Tuæ Majestati rependant præmia. Im-  
pares quidem sumus Tuis meritis, verùm (quod  
Magni Reges facere consueverunt) pusillum non  
recusabis: non quod vellemus, sed quod possumus.  
Inter multos nomen Tuum celebrantes, ego quo-  
que me ingeram, & Tibi **VLADISLAE MAGNE**,  
(velut Artaxerxi inter opulentiores, aurum & gem-  
mas offerentes pauper ille, pauxillum aquæ cùm a-  
liud non haberet obtulit) hoc manifestum animi  
mei, & gratitudinis inditium offeram. Veniam  
dabis, si id non pro dignitate & majestate Tua  
præstitero. Affectus enim, qui suarum virium  
non expendendo tenuitatem, cæcus esse quan-  
doque



doque solet, admonet; ut Tuam in profligando Mosco celeritatem & Clementiam; in submovendo Turca prudentiam ac Fortitudinem; in pacando Sueco bonitatem & dexteritatem, in omnibus demum actionibus quascunque tantum aggredieris, fortunam, & moderationem tam prosperarum, quàm adversarum rerum orbi proponam. Intelligat ille, ad summa Tibi non deesse animum; intelligat Christianitati à Deo, per Te maximam adventuram felicitatem. Ego verò, quia tempus & occasio defuit, ut singulas victorias, diversis gratulationibus prosequerer; hoc unico Panegyrico absolvam, quod à me & singularis virtus Tua, & mea erga Tuam Majestatem observantia, exoptulabunt.

BEL-  
LUM  
MOS-  
COVI-  
TI-  
CVM,

Vetera odia REX INVICTE inter Regnum Poloniae & Ducatum Moscoviae à multis saeculis intercesserant, quae modo inducijs expirantibus, modo indignitate aliquà perpetrata, recrudescabant. Nam cum humanis ingenijs insitum sit, imperio insolenter uti, nec facile modum servare in ea re, quae supra modum : tyrannus eorum ex libidine sua cuncta agens, bella aut differebat, aut proclamabat; & tali quidem ratione, ut per omnes articulos tam Moscoviae, quàm Poloniae gangraena sanguinolenti belli saepius serperet. Vbi contentus non erat suis, vicina invadebat, quae in defensionem sui, universam Rempub. trahebant. Nec id tantummodo circa terminos florentissimi Regni experiebatur, verum etiam in ceteriora terrarum progrediens, obvia quaeque sternebat ac proculcabat. Abacta pecora, vastatos agros, exusta oppida, incensos vicos, homines aut cruciatu propè enecatos, aut gladio ad internecionem deletos, majores nostri cum mœrore viderant,

nos



nos cum ingenti dolore percepimus. Hominis naturam exueret, qui ad tanta crudelitatis vestigia non exhorresceret. Horret animus meminisse, quantâ rabie in gentem nostram asper ac efferatus ille populus sævierit. Calorem solis intensissimum perferre, frigus hiemis immanissimum pati, ardentissimum ignis ufulantis fragorem excipere Sarmata debuit, quando eum Moscus in suam fidem, ut ita dicam, infidam, recipere visus est. Hæc adhuc mediocria in conspectu ac facie orbis forent; nam agere & pati fortia, Polonorum est; nisi graviora scelerati animi inditia emerfissent. Captivos nostros diuturnâ fame ac siti enecare, alligatos ad palum atrociter cedere, suspensos, ferro uncato intra costas & latera illorum adacto, cum exultatione & gaudio intueri, benevalentes excorticare, sanis oculos eruere, aures avellere, ex homine, ut uno concludam verbo, monstrum quoddam efformare, quid Moscis aliud fuit, si non jocus ac lusus? Paria quidem hæc erant vulnera, quando manum manu conferere non verebantur: hanc tamen eorum intolerandam sævitiam Majores nostri sæpius castigarunt. Inter cæteros Stephanus immortalis nominis Rex plurimis præliis ac cladibus, eò illos adduxit, ut contra leges, instituta, religionemque suam, summum Pontificem adirent, & in mediatorem protectoremque Principatus sui, eum ultro assumerent. Nec Sigismundus Tertius æternâ memoriâ celebrandus Princeps, Pater Tuus, vindictam suam mitigavit, sed justâ incitatus injuriâ, impetum illorum retardavit, fregit, contrivit. Hoc nimirum magnorum Regum incumbit negotio, ut illatas injurias non solum propulsent, verum etiam vindicent; ut pericula ultimum exitium patriæ minitantiæ, non

B

tam for-



tam formident, quam avertant. In quo Divi prædeces-  
sores Tui, REX INCLITE, enituerunt, summamq; eâ ra-  
tione apud gentes laudem meruerunt, quod non pri-  
vatum bonum, sed publicum cōmodum semper spe-  
ctaverint. Nunquam eos formidolosi belli rumor cō-  
terrui, non adventantis hostis celeritas de statu rectæ  
rationis deturbavit, non vexilla hostilia, circa Reipub.  
viscera hærentia terrefecerunt, at immotos, constātes,  
intrepidus, extra aleam suam, Fortuna rerum cuncta-  
rum Domina, constituit & collocavit. Quot prælia, tot  
exempla, quot victoriæ, tot testimonia. Commis-  
sis inter se aciebus & victricibus signis Parentis Tui, Mos-  
cus, nullo unquam tempore, resistere ausus est; vel si  
etiam ausus fuisset, non tamen potuisset. Ille invictus  
ejus animus, illa vigilantia, & rei militaris vigor, tro-  
phæa statuebant, statutis primis, alia mox præpara-  
bant. Quorum triumphorum, Te socium Pater pien-  
tissimus habere voluit, ut tempestivè patriam amare  
ac defendere inciperes, quæ Te delicias suas, à primo  
nativitatis Tuæ exordio (præfagiens futuram Tuam  
magnitudinem) diligere ac observare incepisset.  
Nam missus in florida Tua juvenia, contra atrocem  
ac omnibus formidandum hostem, tam dextrè &  
tam generose militaria munia perficiebas, ut Te Ci-  
ves Principem, milites Imperatorem, hostes suum do-  
minum consalutarent. Et tunc pacem sibi dari expe-  
tebant, cum eorum Princeps pronunciatus fuisses.  
Quod equidem summo omnium applausu affecutus  
es; cui non tantum Magnum Moscoviæ ducatum, ve-  
rùm etiam spatiosissimum quodcunq; in terris impe-  
rium, ob virtutem annos Tuos præcurrentem jure de-  
beri, etiam hostis profiteri non erubuit. Tantis rebus  
& tam feliciter transactis, omnes Tibi, nominique no-  
stro gratulabantur; omnes jam maturam, ac adultam  
fore pa-



fore pacem existimabant. Verum quid sub sole stabile? Animus hominis, igneus quidem, purus, sublimis, diuinus est; at raro constans, ac in proposito stabilis. Nam cum ambulatoriae sint nostrae cogitationes, ad quamvis auram facile flectimur, facilius de vero virtutis ac constantiae tramite deducimur. In quo autem animus hic recte constitutus non est, & alijs imperat; grave humano generi exitium paratur. Hinc REX MAGNE intelliges, quanta in imperante adesse debeat constantia. Moscus enim sua levitate ostendit, quam periculosum sit, fidem ante tempus violare, & consilio prudentum non stare. Poterat suis terminis esse contentus, poterat finitâ certorum annorum pace à Te aliam expectare, si voluisset & petiisset. Gloriam ac famam Tuam aliquid diminutum fuisset, si suae securitati consulisset (nam nisi ille ansam Tibi ad victoriam præbuisset, tantam nominis existimationem, quam orbis adorat, serius forsan acquisivisses) neque tot strages & clades hostium, si intra terminos suos se continuisset, in stuporem totum ferè mundum attraxissent. Sed turbulentus animus illius eo perduxit ipsum, ut contra jus gentium, quod sacrosanctum omnibus esse debet, ad bellum, nodum inducijs exspirantibus, properaret ac festinaret. Ex omni terrarum parte milite convocato, exercitu apud nationes longinquas conscripto exercitato, classicum concinebat, pecunia nervo belli per totum ferè induciarum tempus collecto & parato totus irâ furoreque percitus in nostrum interitum ruebat. Imaginem futurae calamitatis tunc ob oculos sibi incolæ proponebant. Colonus agrorum vastitatem prævidebat, mercator mercium suarum distractionem verebatur, studiosus dissolutionem artium liberalium dolebat, oēs violationem quietis publicae formidabant. Quanta inde mala orire-



tur ingenio sagaci multi concipiebant; Cum tamen difficile sit, contra stimulum calcitrare, Imperatori & domino suo nomina dabant ac sacramento se obstringebant, ut paulo post tanquam pecora ad victimam ducerentur. Præmissus itaque Seinius in ditio- nes imperio Tuæ Majestatis subjectas, flammâ & ferro cuncta absumebat; agros, domos, homines, vastabat, incendebat, enecabat. Formidolosam adventus sui speciem omnibus præbebat, ut propter crudelitatem illius aut acies nostræ consisterent, aut subditi ad reverentiam ejus converterentur. Primum impetum furibundi Ducis Smolenscum, vrbs quâ fidelitate in Principem suum, quâ fortitudine in hostes, celebris, excepit. Premebatur arctâ obsidione illa civitas, quam hostes, portam Poloniæ esse credebant. Vicina oppida in summo metu erant, ne tam diuturno tempore ad ferociam Moscorum reservata fuisse viderentur. Quod remedium in tantis malis? Consistendum ne erat Tibi, qui recenter in Regem Polonorum eligebaris, an progrediendum? Utrumq; salus patriæ exposcebat. Nam & consistere aliquamdiu poteras ut controversias tempore interregni enatas, mitigares; & progredi volueras, ut hostem ad internecionem nos vocantem, protinûs fugares ac deleres. Omnis spes in celeritate posita, omnis victoria in festinatione constituta fuit. Momento enim temporis res magnæ quandoque vertuntur. In omnibus verò actionibus celeritas recte prævisa laudatur, præsertim in bellicis ut plurimum commendatur; ubi à Deo, fortuna, & scientia militari victoriæ dependent. Postquam certior factus es, Moscum hostiliter advolasse, illicò tanquam alter Hercules ad domanda monstra, quæ fortitudini suæ pro exercitamento proposuerat, velocior



velocior (quod dicitur) Euro, non habitâ ratione sanitatis & Majestatis ad liberandum obsidione Smolenscum, imò universam patriam accurristi. Non te castella & munitiones in palæstra Bredana artificiose & summo cum ingenio excogitatæ retardarunt, non numerosus atque ad extirpandam gentem nostram conflatus exercitus terruit, non Ducum fastus ac protervia ab instituto cursu revocavit: sed hæc omnia, quæ alios deicere de proposito laudabili solent, Tibi majores ausus addidère. Nam veluti ignis vel casu, vel malignitate alicujus in tectum immissus, conceptâ flammâ ac ardore, validissima ædificia absumit & absorbet, obvia quæque comminuens, ac in favillam convertens: Sic Tuus REX INCLITE igneus animus, edoctus illud periculum non nisi periculo vinci; Tua ignea ac fulminatrix acies exercitum illum hostilem, toti Europæ terribilem contempsit, contemptum facili negotio oppressit. Vix Te hostis Varsavia egressum audierat; & jam aderas castraque Tua castris ejus opponebas. Vix Te militem colligere, ac instrumenta belli conquirere, per exploratores cognoverat; & jam civitati in auxilium adveneras, illumque castris pellebas, ac commeatu prohibebas. Solus Rex, ut miles, pugnavisti, solus Imperator ut gregarius, belli incommoditates pertulisti. Duces ipsi Radzivilius & Kazanovius; quorum facta immortalitatem spirant, Tuis auspiciis freti, virtuteque propriâ suffulti, quicquid attentarunt, perfecerunt. Nobilitas universa, & flos equestris ordinis Tuo ductu, per densum mucronibus ac sclopetis agmen ad gloriam animosè contendit. Milites cuncti Tuo exemplo per ardua militiæ experimenta victorias & triumphos maturarunt. In hac animorum consensione;



in hac Regis & militis vigilantia ac fortitudine Mos-  
cus aliquid sibi licere, ausus fuisset profiteri? Prævidit  
ille suam ruinam, cum Te advenisse intellexisset. Sci-  
vit enim, quantum ad victoriam conferat, imperato-  
ris promptitudo, & militum obedientia: quando ille  
loci & temporis commoditate utitur; hi benignitate  
imperantis non abutuntur. Hæc in Te, hæc in exer-  
citu Tuo non desiderabantur. Idcirco quamprimum  
Seinius Tuas viderat acies, exhorruerat, & una cum  
militibus suis animo ceciderat. Frustra tantum exer-  
citus se congregasse, frustra tormentorum & alia-  
rum machinarum bellicarum ingentem numerum  
se comparasse advertit; ubi Tuam in administrandis  
negotiis dexteritatem & felicitatem perspexit. Mul-  
ta consultò prætereo, ut tempori cedam, quæ manum  
Dei Tecum fuisse, & pro Te pugnasse, manifestè de-  
clarant. Quis enim non mirabitur, imo supra huma-  
na consilia & conatus ponet? quod intra exiguum  
tempus septuaginta octo millia hostium partim de-  
leveris, partim in captivitatem abduxeris? quem non  
in stuporem convertet ipsius Seinii, atque aliorum  
belli ducum coërcitus fastus, & compressa arrogan-  
tia? Non ita pridem Poloniam vastare cogitarunt:  
Tu Moscoviam peragrafti, eam ferro atque igne ca-  
stigasti. Ipsi militem nostrum contempserunt; Tu ex-  
ercitus cum castris & duce magis temerario quam  
generoso, cepisti ac delevisti. Ipsi victorias somnia-  
runt; Tu citius, quàm crederent aut sperarent, glorio-  
sè triumphasti. Ante pedes Tuos procumbentem vi-  
disti hostem, viribus suis effusè confidentem; ipsum  
Seinium cæterosque belli illius fautores ac promot-  
res, submissè veniam deprecantes, Tamque Majesta-  
tem venerantes, conspexisti. Quid poterat esse ad so-  
lidam



lidam gloriam illustrius? Castris hostem exuisse, exercitum universum delevisse, Ducem ipsum cepisse, an exiguum opus? Non hisce adhuc terminis Fortuna Te esse contentum voluit, ipsa Te in abditio- rem Moscoviam comitata est. Urbes, quot in conspectum Tuum venerant, tot expugnasti. Ad Bialam vario quidem Marte decertatum est, victor tamen evasisti, quia leges pro libitu sanxisti. Nam cum incerti bellorum exitus sint, magnum nomen sibi is comparat, qui in ista rerum vicissitudine, æquanimi- tatis laudem adipiscitur. Itinerum ac locorum incommoditates multos afflixerant, summo cum dolore Tuo, nihilo- minus idem Tu quoque perpe-ssus es, cum maxima nostrum omnium & consolatione & commiseratione. Dolebamus, quod in pericula manifesta Te conjiceres, qui salutem patriæ, salute Tuâ contines; at dolorem leniebat nostrum, idem Tuus cum milite victus, idem somnus, eadem procedendi & commorandi iniquitas. Hâc itaque tolerantia provincias amplas emensus, Tuo imperio eas subjecisti; hâc celeritate agmina hostium prævenisti & fudisti; hâc fiducia duces belli aggressus ad conditiones pacis petendas illos coëgisti. Totus exercitus hostilis, qui ex tanta clade reliquus restabat, ditiones illæ, quas domuisti, omnia denique jure belli acquisita, jam Tua erant. Disponere pro arbitrio rebus, militibus, subditis poteras; hos gladio subjicere, illos longâ captivitate conficere, alios ad cruciatus, alios ad servitutem condemnare, Tibi liberum erat. Verum naturæ potius, quàm affectui obediendum ratus, satis Tibi fuit, parcere subiectis, & debellare superbos. Hæc enim Regum summorum vera gloria est, cum sævire possint, clementer imperare, cum vindicare injuriam valeant, oblivisci incom-



incommodorum tam sibi, quàm Regno illatorum. Varietatem fortunæ, quam reverenter habere & moderari confuevisti, tunc animo voluebas, quando ex tam numerofo hostium exercitu octo tantum millia remansisse cognovisti; quando cohortes militum, vexilla ante pedes Tuos deponentes; Seinium in genua demisso vultu ante Majestatem Tuam sese provolventem, cunctos, qui eorum partes secuti sunt miseriam suam deplorantes, perspexisti. Belluarum esse judicabas morē, vires suas exerere in inferiores, quos aut casus, aut malevolentia, in societatem calamitatis alienæ, deduxisset. Vitā proinde omnes, eos donasti, qui clementiam Tuam potius in castris, quam in campo aperto fortitudinem experiri maluerunt. Novum vincendi genus tunc reperisti, dum humanitate, non multitudine, benevolentia non potentia; bonitate non crudelitate, cum hostibus certares. Quod profectò summam Tibi famam non tantum apud hostes, sed etiam apud omnes populos conciliavit, qui Tuam fortunam ac lenitatem potius sequentur, quàm Tyranni alicujus vultum ferocem aspicient. Cujus gloriæ neminem socium habes. Nam cum ad victoriam duces, milites, instrumenta bellica, fortuna etiam præcipuum conferat adjumentum; Tuo quidem ductu & Tuis auspicijs, triumphos esse cumulatos, non tamen sine eorum auxilio prædicare potes. Verum clementem esse in hostes, in cives, in externos, proprium Tuum est, cui propitius Mars absolutam vitæ & necis in omnes delinquentes dedit potestatem. Nec video quid magis deceat summos Reges, quàm Clementia; ut eâ ratione amentur, non timeantur. Malus enim custos diuturnitatis est metus; benevolentia è contra, vel ad perpetuitatem fidelis. Multi  
dum po-



dum potius timeri, quàm diligi malunt, miserandum in modum interierunt. Te autem, O REX, hostes timent, atq; ad nominis Tui claritatem contremiscunt; nos verò cives diligimus ac observamus: quanquam & adversarij Te jam amare incipiunt, quia Te mansuetum esse adverterunt. Cum timore & tremore ad Te, qui dominus vitæ eorum fueras, accesserant; at postquam faciem Tuam plenam clementiæ, auctoritatis, majestatis, conspexerant, jam non de vita desperare, sed de eadem profundenda pro salute ac dignitate Tua, cogitare ceperant. Unde pars dicto Tibi sacramento, in castris remansit, pars ad Principem suum, Te consentiente rediit, ut Tuam benignitatem extolleret, atque ad componendam pacem adhortaretur. Votis fortuna respondit. Quamprimum enim Magnus Dux Moscoviæ, deletum exercitum suum, vastatos agros, exusta oppida, incensos vicos, cæteraque belli incommoda, cognovisset; illicò legatos suos expedit, qui Tuam justam vindictam mitigarent, ac pacis leges acciperent. Quo in negotio usus operâ Jacobus Zadzik Cancellarii Regni Poloniæ, tanquam alter Pyrrhus Cyneæ, qui suavi eloquio suo, urbes non minori numero, quàm Rex fortitudine ad deditionem compulit; illius inquam Episcopi curâ adhibitâ, qui nec laboribus, nec ingravescenti ætati suæ, propter commodum & Tuum, & Patriæ parcit, quæsitam pacem Moscis concessisti. Atque eam ob causam, quia bellum omnibus formidabile, brevi tempore extinxisti, dum maturares in patriam iter; effuso gaudio cuncti cives, primam laureatam coronam ob devictum Moscum debitâ ratione & honore Tibi congratulabantur.



BEL-  
LUM  
TUR-  
CI-  
CUM.

Rebus ita feliciter in Moscovia transactis, ad otium & quietem, ad munia pacis animum convertere placuit. Sed Gloria his Te gradibus, REX Magnanime, consistere non permisit, verum ad trophæa in Oriente erigenda evocavit. Immanissimus enim Reip. Christianæ hostis Turca: propione, an invidarum fortunæ Tuæ nationum instinctu, tempore infestissimo, dum Moscum in Septentrione ad officium redigeres, ingenti exercitu è ditionibus suis congregato, eum cum Abazi Bassa, ad regnum Tuum devastandum emisit. Præcipitatus hic incursus, non tātum Poloniam, verum etiam universam Christianitatem conterruit. Multi externi falsò opinabantur, Te implicatum difficili cum Moscis bello, huic resistere minimè posse, quem Europæ magna pars veneratur, cuius nutum Asia & Africa observat. Plurimi incolæ jam non de fortunis suis, sed de salute desperabant. Videre quisq; poterat ad loca summo Deo, Divisq; tutelaribus sacrata, virginum procumbentium fletus, matronarum plorantium gemitus, juvenū preces fundentium lachrymas. Omnium deniq; ordinum homines pietate & liberalitate majestatis divinæ iram lenientes, conspiciabantur. Rumor tanti periculi & ruine ad Te in Moscoviam non uno aut obscuro, sed omnium claroq; sermone pervenerat. Quid faciendum esset in hac rerum angustia tacitus revolvebas. Nam incepisse & nō perfecisse, temeritatis & nocivæ rei vices quandoq; obtinet. Satius est non incipere, quàm cum dedecore desistere. Hoc Te etiam Magni animi Principem stimulabat, ut potius inchoatum bellum cum Moscis ad exitum optatum perduceres, quàm hoc deserto, aliud inchoares. Ne tamen & hoc in passu bona ac vita nostra vacillarent, ad Stanislaum Konięcpolscium Generalem



ralem exercitus Tui ducem citato gradu expeditivisti nuncium, ut Reipub. in Tua absentia consuleret, ac desperatis jam prope rebus, insperatam opem adferret. Ille Tuis auspiciis innixus, alter velut Parmenio sub Alexandri Magni imperio intrepidè contra hostem eduxit copias; ac Imperatoris boni, & militis strenui functiones perfectè adimplevit. Nihil vel ad prudenter in castris disponendum, vel ad fortiter pugnandum, vel ad aciem artificiosè instruendam deesse potuit: cum omnia animosè, patienter, constanter, summa cum laude & merito perficeret. Et quis sub Tuo sole certas victorias sibi non promitteret? Ingruente periculo, universa illius territorii nobilitas unanimi consensu, & propendentibus in unum votis, ad castra, ad Ducem, Tui defendendi, protegendæque patriæ causâ, confluit. Labores & impensas nihili æstimavit, dummodo Tu incolumis, Respub. salva permaneret. Civium enim patriam suam amantium munus esse ducebat, facultates & vitâ profundere, ut tantum publicum bonum aut inviolatè conservetur, aut studiosè augeatur. Inde proveniebat, ut ad nomen Tuum, omnibus hostibus formidabile, summo exercituum duci, nomina illi darent, quicunq; patriam adhuc florere ac vigere cuperēt. Ipse belli Imperator nec consilio nec viribus deficiebat; sed contra Abazi Bassam, qui nomen sibi ex perfido & scelerato bello (fidem enim fregerat) sollicitè quærebat, magno fidenti; animo, quod venturæ victoriæ certum esse inditium solet, acies promovebat. Postquam hostis castra castris, viros viris, oppositos videret, subito adventu militum Tuorum consternatus, quid consilii caperet, anxie ruminabatur. Nam cū nos imparatos, alijsq; difficultatibus implicatos esse existimaret, totā Poloniam



inani spe jam ad direptiones, jam ad cædes destinaverat: sed ubi strenuum militem, fortem Imperatorem, acies optimè instructas advertit, quid agendum esset, seriò cogitabat, & inter sacrum saxumque (ut dicitur) stabat. Moras tandemnectere, velitationibus tempus eludere, occasiones bene gerendæ rei aut penitus tollere, aut datas nullatenus admittere cepit; ut tanto turpius è patria nostra fugeret, quanto celerius omnium opinione advolasset. Neque nostris militibus in hac hostium consternatione animus deerat, quacunque ratione poterant, extremum ipsorum agmen carpebant. Ac veluti in undoso mari tempestate aliquâ agitato, fluctus sese insequentes, & quodammodo sese absorbentes, conspiciuntur; ii verò præ cæteris maximè triumphare videntur, qui in littore ipsi jam securi, alios, quos ventus rapit, protrudunt: ita etiam in illa camporum vastitate, dum Abazi Bassa ex septuaginta millibus militum suorum, vix medietatem ad Imperatorem Turcarum reduceret, & unus præ alio nobilior in fuga esse vellet, proprio impetu, multi interierant, quos autem nostri milites afsecuti sunt, eos cædebant, nullo à tergo hoste relicto, omnique periculo immunes. Atque sic furibundus Turcarum Dux, nucleo amisso, pignoris loco sibi putamina reliquit, ne Polonorum oblivisceretur. Hâc fuga suorum concitatus, ipse Imperator in vindictam exarsit, ac superbè spreto legato Tuo, arma & viros apparabat. Asiæ & Africæ potentiam ac molem in Tuum conferre Regnum voluit, ut sicut cæteris, multa per fraudem, summumque scelus eripuerat, ita etiam Tibi in Europa amplissimas provincias possidentibus, per vim aliquid adimeret. Spargebantur rumores, volitabant tabellæ, quæ pompam expeditionis ejus continen-



continentes, terrorem illis injiciebant, qui certio-  
rem in humano consilio ac potentia, quàm in divino auxi-  
lio & justa causa, spem reponebant. Non suorum  
consiliarium dissuasione, non Osmani exemplo re-  
centi, non Polonorum spectatâ illis in bellis virtute ac  
robore movebatur; sed fastu ac furore plenus, status  
nostri, vel potius sui, labefactionem tanquam è spe-  
cula aliqua prospiciebat. Sic immensa Regna tandem  
suis viribus fatiscunt, nec quidquam durable esse po-  
test, quod violento modo in virium & divitiarum ac-  
cessionem, inhiat. Exigua sæpè imperia, salubri & mo-  
derato consilio firmata, citius ad speratam felicitatem  
perveniunt, quam illa, quæ nimiam amplificationem  
inaniter concupiscunt. Quo in negotio, R. EX Invicte,  
prudentia Tua, quam semper omnibus in rebus co-  
mitem habes, & quæ, majora in dies capit incremen-  
ta, maximè enituit. Tuo contentus, aliena non ap-  
petis, verùm in manus datâ per hostem occasione, ve-  
tera dominia recuperas, fines Reipub. protendis, an-  
tiquas consuetudines revocas, pacta cum Majoribus  
Tuis conventa repetis & confirmas. Quæ imperandi  
ratio felicior & securior cæteris omnibus esse solet,  
cùm candido pectore, exporrectâque fronte, Machia-  
vellicorum Politicorum (quos seculum hoc, & li-  
bido regnandi produxit) dolos, & captiones elu-  
dis, qui cum fallere intendunt, ipsi maximè falluntur,  
consiliorumque, in aliorum perniciem directorum,  
ipsi pœnas luunt. In hanc labem Respub. nostra nun-  
quam incidit quæ hostem aperto Marte, non occultâ  
fraude prosternebat. Tu quoque divorum prædeces-  
sorum Tuorum gloriæ hæres, nihil simulatè, nihil fi-  
ctè agis, id unum curas, ut hostes fidem, vicini amo-  
rem, cives benevolentiam Tuam experiantur. Quod



luculenter cum in aliis Reipub. summis angustiis, tum  
 præsertim in hoc Turcico bello testatus es. Cum enim  
 justam nactus fuisses occasionem arma transferendi  
 in ditiones Imperatoris Turcarum, tanquam laceSSI-  
 tus injuriâ; expectare tamen ulteriorem progressum  
 malebas, quàm fidei semel datæ, aliquam ignominia  
 notam inurere. Pacato feliciter Mosco, in itinere non  
 aliud animo Tuo, nisi Turcicum bellum, quod pericu-  
 losius & propinquius erat, obversabatur. Quâ ratione  
 aut mitigandum, aut penitus eradicandum esset, dili-  
 genter providebas. Non eras nescius, negotiorum  
 perplexitatem consilio prudenti expediendam esse.  
 Plurimi infelicem eventum rerum suarum serò do-  
 luerunt, quòd illum, dum tempore idoneo gaude-  
 rent, sagaci ingenio non prævidissent, nec expendis-  
 sent. Diu deliberandum est, ut citius deliberata exe-  
 qui valeas. Ideo in otio minimè otiosus fuisti, ac tum  
 maxime de integritate ac salute Reipub. cogitabas,  
 cum Te alij solum esse, arbitrarentur. In patriam ve-  
 rò redux, vix diebus aliquot respirasti, vix pulverem  
 ex Moscoviticis concertationibus conceptum abster-  
 fisti, confestim ad alteram gloriæ palmam, manibus  
 pedibusque (ut ajunt) ruebas. Et ne quis vanus id  
 Te temerè vel incipere, vel agere argueret, comitia in-  
 dixisti, consilia communicasti, ut procures ac equites  
 amplissimi Regni, & Tuæ, & Patriæ incolumitati pro-  
 spicerent. Ingens tum admiratio, cunctorum animos  
 perculit, quòd Te fatigatum, ac laboribus fessum, ma-  
 teria jam jam adventantis felicitatis non sineret qui-  
 elcere. Qualem, inquiebant, habituri sumus Regem,  
 quàm gloriosum, quàm potentem? qui sanitatem &  
 thesaurum, conservandæ Reipub. dignitatis causâ  
 profundit? Sequamur hunc, qui majorum suorum,  
 non ad-



non adæquare, sed superare virtutem nititur. Progre-  
diamur in hostem toti Christianitati infensissimum  
hoc Duce, hoc Rege, hoc VLADISLAO, superio-  
res, victores, triumphatores evademus. Comitemur  
hunc, qui fidem hostibus inviolatè servat, qui pruden-  
tiæ & fortitudinis suæ viva omnibus præbet argu-  
menta, qui potius sub dio, & in castris, quàm sub auro  
tecto & in splendidis ædificiis, ætatem floridam  
mavult transigere. Non nobis sumptus, quos erogare  
pro patria decorum est, non mors, quam oppetere  
pro gloria jucundum videtur, aliquam difficultatem  
injiciant; verùm sub signis victricibus Regis nostri,  
qui ultor sanguinis innocui, illius Vladislai, qui ad  
Varnam occubuit, à Deo datus est, illum hostem pro-  
sternamus, qui ruinam & occasum Reipub. Christia-  
næ minitatur. Tales, REX MAGNE, sermones  
de Te ferebantur, quos altus & magnanimus Tuus  
animus ex cordibus omnium elicuit. Neque ullus re-  
pertus est, qui in administrandis bellis, præsertim hoc  
Turcico Tuam prudentiam, & constantem mentem  
non admiraretur, non deprædicaret. Nec immeritò:  
nam ubi domesticis providisti negotiis, ne quid mora  
& cunctatio detrimenti Regno adferret, præmissis  
tormentis, cæterisque ad bellum ritè gerendum, in-  
strumentis, itineri Te accinxisti. Jam etiam exercitus  
Tuus, cum Ductore suo in castris, alacri animo Te  
præstolabatur. Numerus quoque voluntariorum, qui  
Tibi & patriæ se fortunasque suas devoverant, auge-  
batur. Thomæ Zamoscii, Stanislai Lubomierscii, Vis-  
nieviciorum, Ducis de Ostrog, Tiskevicii, ac cætero-  
rum virorum, qui heroicis suis factis, strenuitate, for-  
titudine, ad immortalitatem tendunt, copię conflue-  
bant. Te solummodo requirebant, cujus virtuti for-  
tunam



tunam esse adnexam sciebant. Te præsente, nullas acies, nullum hostem, nullum impetum pertimescebant, quin imo audacter fidenterque victoriam, sibi pollicebantur. Et quem obsecro non excitaret ille heroicus Tuus animus? quem non commoveret illud Tuum generosum pectus? Cum enim fortitudo non solum in subeundis, verum etiam in perferendis periculis consistat, laudem sanè Magnanimitatis consecutus es, quando vultum plenum lætitiæ, voluptatis, securitatis, civibus hoc metu consternatis ostentasti. Verebatur jam omnes, ne vis hostilis faceret opes nostras æquabiles; timebamus, ne manus eorum sanguinolentæ, nobis libertatem eriperent; solliciti eramus, ne cum opibus, & libertate, vitam simul amitteremus. At, quam primum Tuam nobis intueri præsentiam datum est, subito timor omnis evanuit, qui non tam ex pusillanimitate, quam ex periculi gravitate, ortus erat. Nam cum Te videremus contra hostem fidenter & audacter procedere; cum perpendere Tuam arduis in rebus patientiam, in adversis constantiam, in dubiis perseverantiam, fracti timore assiduo, jam erigebamur, mentesque nostras Te auctore & adiutore, altiori fortunæ componebamus. Fit plerumq̃, ut subditi ad Domini sui, cives ad Principis voluntatem, sese accommodent; & hoc læto, illi læti sint, hoc consternato, illi mœrore doloreque repleantur. Et sicut Helitropium ad Solis motum obvertitur, illiusque quodammodo ductu, circulariter fertur: ita etiam regnicolæ, sui Regis animo, proprias cogitationes metiuntur. Tu, Rex Invictæ, cum æquus moderator fortunæ sis, nunquam nobis causam tristitiæ præbuidisti; & quamvis tempore iniquo, bella importuna ac difficilia ingruerent; tamen alacri fortiq̃;

animo



animo spem non exiguam, futuræ victoriæ nobis  
frequenter exhibuisti, atque etiam nunc exhibes. Ille  
hostis, quem Italogum, Hispanorumque celeberrima-  
rum in orbe nationum, vires ac opes, non validè repri-  
munt; cum quo Galli foedus amicitiamque inierunt,  
Tuæ fortunæ, virtutiq; cedere coactus fuit. Nondum  
in castra Tua, milite promptissimo strenuissimisq; du-  
cibus, refertissima advenisti; nondum acierum pul-  
cherrimè dispositarum spectator adfuisti; nondum  
timpanorum sonitu, & tubarum clāgore, signum pu-  
gnæ dari militesq; ad certamen excitari, vidisti; & jam  
ipse Turcarum tyrannus, cum colluvie gentium sua-  
rum, de Tuo adventu certior factus trepidabat, ac pa-  
cem ante per Legatum Tuum oblatam, à se verò spre-  
tam neglectamque exposcebat. Noluit enim ancipiti  
Martis aleæ se committere, siquidem nō ignorabat, se  
cum illo in prælium campestre descendere, qui artem  
hāc ac lusum, plurimis periculis ac summis laboribus,  
sibi familiarem felicemq; hostibus formidabilem ac  
infelicem effecisset. Nam cū bella famā plerumque  
constent, gerantur prudentiā, perficiantur experien-  
tiā, roorentur victoriā, nemo unquam dubitavit de  
prospero hujus belli eventu, quod illa omnia Tibi ad-  
esse, omnes adverteremus. Hinc benè sibi consuluisse  
Turca judicandus est, qui Tuam præsentiam non ex-  
spectare; sed potius litem hanc difficilem, non prælio,  
verū velitatione, non certamine, at pace, sopire ac  
finire voluit. Postquam enim Te Leopoli victorem ex  
bello Moscovitico consalutaret, & bono omine alios  
triumphos gratularetur; ecce adveniunt è castris viri  
pacem ferentes, & pacta cum Sigismundo Primo re-  
vocantes ac confirmantes. Facile id à Te impetrarunt,  
qui acquisita majorum Tuorum industriā prudenter

onod D potius



potius conservare & tueri, quàm aliena avidè concupiscere, ac fraudulenter rapere elaboras. Atq; ea ratione formidandum Christiano orbi bellum, sine cruore, sine cæde civium, solo nominis Tui terrore, Tuæq; virtutis majestate sustulisti. Maxima tunc omnium lætitia hominum erat; summa gestientis animi signa cuncta proferebant, quando eum hostem ad viscera Regni penetrare non permisisti, qui instar accipitris, quicquid unguibus apprehendit, illud firmiter tenet & discerpit. Ideo universa Christianitas, quæ Te murum ac defensorem suum contra Turcarum insolentiam agnoscit, alterâ laureatâ coronâ, sacrosanctum verticem Tuum insignivit.

BEL-  
LUM  
SVE-  
TI-  
CLUM.

Potentissimis hostibus taliter coërcitis, Suecia Regnum Tuum hæreditarium, per alium vero usurpatum obtentumque, domanda restabat. Non medio cre opus; tot annorum & temporum difficultates, exiguo temporis intervallo, tollere. Divus Parens Tuus, fastum & pertinaciam eorum, tanquam rebellium subditorum, sæpius depressit, & variis secundisq; præliis, in ipsis penetralibus Regni Sueciæ, in Livonia, & Prussia, eos afflixit; fortuna tamen coronam hanc gloriæ Tibi reservavit, ut justo solertiq; ingenio, illos ad sanio rem mentem reduceres. Exspiraverant jam sexennales Induciæ; ad arma, ad cædes, ad bellum cuncti confluebant. Alij, quis rerum exitus futurus esset, à longè prospectabant; alii, qui præteritis cladibus ad summam egestatem devenerunt, anxii ac dubiis animis, aut ultimam miseriam, aut expetitam pacem sperabant. In hac animorum & civium distractione, Tu solus Dominus & arbiter pacis belliq; providebas, quid cum Majestate Tua, dignitate Regni, authoritate Senatus, incolumitate equestri ordinis, bono



bono universæ patriæ statuendum esset. Nihil enim ad laudem & commendationem perpetuam, præclarius Principi accidere potest, quam cum status sui, quem regit, rationes optimè novit, & secundum eas cursum victoriarum moderatur. Quis autem peritior Te regnandi artifex? quis acuratiores dominandi magister? quis clarior in imperando Princeps? Si à teneris assuescere multum est: in ipso flore juventutis hæc Tua palæstra, hæc Tua exercitatio erat; Obedire, & Imperare. Cupiditates rationi subiecti, affectus refrenasti; & tum corpus morigerum se præbuit; dum animus imperium obtineret. Sed non tantum hoc Tuum Imperium erat, fuit & aliud, quod placido animo obire didiceras. Sacratissimæ memoriæ Parens Tuus, aptum Te imperio cum adverteret, nullum prætermisit tempus, quo Te ad publica negotia non vocaret, & ab ipsa inventa, artibus benè imperandi non imbueret. Nunquam, siue quid publicè, siue quid privatim ageret, à latere suo Te discedere voluit, ut ad animi dotes, quas maximas & raras inter Principes, Tibi natura contulit, usum rerum adjungeres. Hoc igitur ex fonte, singularis in patriam civesque Tuos amor promanavit; quos cum damno suo, nonnunquam etiam periculo conatus es incolumes videre. Ex florentissimo Regno, flos juventutis, ad extinguendum in Prussia incendium, quo jam jam conflagrare, & in favillam converti debuit, confluxerat. Dux ipse exercituum, animo & viribus potens, Tuis auspicijs innixus, jam classicum concinnare, & pugnam inire paratus erat. Miles Tuo ductu in confertissimas hostium acies prorumpere volebat. Cohortes splendidissimæ ac robustissimæ, Tuum



nutum attendebant. Quid multis? cuncti eo animo in provinciam venerant, ut, aut morerentur aut vincerent. Neutrum REX MAGNE permisisti, ut vel mortem acerbam subirent, vel cruentam victoriam Tibi pararent. Vicisti Tu, vicerunt milites, vicimus nos omnes sine prælio, sine sanguinis profusione, sine interneccione. ô Regum laus maxima! ô Principum vera gloria! Triumphare sine spoliis, Dei opus est, qui dat, non accipit beneficia. Spolia sine triumpho congregare, hominis conditionem superat. Quæ vero Tua spolia, quis triumphus est? Hostem accedentem ad Te iniquis, ferocibus, superbis conditionibus, qui supplex ad Te velut ad Dominum suum venire debuit, humanitate, benignitate, clementiâ vincis; & tum triumphas. Eundem multa sibi attribuentem, non armis vindicas, sed ratione justitiâque ad reverentiam Tui nominis compellâs; & tum exuvias detrahis. Remansit fertilissima Regio PRUSSIA; tot civitates, & castella, quæ externis etiam, aliorum litteris & sermone, celebratis fortalitijs æquantur, remanserunt. Tibi suam incolumitatem & Fortunam debent, qui provinciam universam ex hoc naufragio eripuisti. Clementiâ itaque bellum hoc, quod jam cervicibus nostris imminebat sustulisti, non autem sanguine civium extinxisti. Non quod formidares, cum eo hoste in certamen descendere, qui campo aperto semper Polonum fortem & alacrem miratus est; verum, quia cives in discrimen conjicere noluisti. Et quis obsecro viribus Tuis restitisset, qui Turcam, Moscum, potentissimos Europæ Monarchas, exiguo temporis spatio, & parvo exercitu, ad officium



officium redegit? Quis Fortitudinem Tuam tentare ausus fuisset, qui dexteritate, celeritate, magnanimitate adversarios Tuos superasti? Quis Tecum congredi voluisset, quem Fortuna rerum dominatrix, semper comitatur? Celebri etenim apud gentes famâ Principes illi resplendent, qui non tam armis, quàm virtutibus hostes in sui admirationem pertrahunt. Quod sane Tibi accidisse, gloriari potes. Cum Turca & Mosco, armis ac omni virtutum genere decertasti; cum Sueco justitiâ ac clementiâ contendisti. Florem totius nobilitatis Polonicæ, dubio Martis eventui committere detractasti; aliud certamen minus periculosum, magis verò proficuum delegisti. Locum Tractatum assignasti, ut ibi à latere Tuo deputati Commissarii, aut de pace, aut de ulterioribus inducijs, certi aliquid statuerent. Principum etiam Christianorum Legati aderant, qui controversias utrobiq̃ue enatas, vel sopirent, vel tollerent. Duriore conditiones petere cœperat hostis; quibus Tu exacerbatus, classis cum jam cecinisses, ac milites ad pugnam disposuisses, nisi publicæ tranquillitatis cura, animo Tuo infixæ hæssisset, altasque jam radices egisset. Et sicut magna flumina rapidissimo fluxu, cum detrimento maximo rupium & domorum adjacentium, in mare decurrerent, nisi vis aliqua major, aut obstaculum è terra efformatum, aggervè illorum rapacitatem ac pernicitatem retardaret; Sic tu fluminis instar, cum exercitu Tuo, multoties victorioso, in hosticum penetrare decrevisti, obvia quæque sternere, vastare, annihilare cogitans; nisi vis major, patriæ scilicet incolumitas, quæ multis quassata calamitatibus, solatium à Te expectabat,



furorem Tuum, justè in hostes conceptum, repressisset. Quanquam in ea hostium pertinaciâ, quis pacem sperasset? in eo belli apparatu, quis salutem quæfivisset? De die in diem Te trahere, occasionem ac tempus rei benè ac cōmodè gerendæ præripere; fortitudinem Tuam tentare videbantur, cum novas semper conditiones in medium afferent. Quod tu sagaci solertiq̃ue ingenio dum adverteres, majorem etiam apparatus bellicum comparare non destitisti. Milites quotidie ex omnibus Regni Tui partibus adventabant. Tormenta, pulveris immensam copiam, cætera belli fomenta, Vistula celebratum apud historicos flumen, in castra ad ripas suas, pulcherrimè disposita, devehebat. Cunctorum animi in bellum propendebant, & quid æquo Marte, collisus in campo patente inter se exercitus, statueret, prospectabant. Non in Duce alacritas, non in milite ardor defuerat; sicut hic, imperium illius, nutumque Tuum expectabat; ita ille hostium consilia notabat ac observabat. Nihil verò ad victoriam obtinendam accommodatius esse potest, quàm Imperatoris militumq̃ue strenuitas; cum ille consilio & circumspectione; hi promptitudine, agilitateque animi & corporis, publicam incolumitatem tutantur promoventque. Ejusmodi viris, non armata vis, non confertæ hostium acies, non densa agmina resistunt: verum ultro virtuti illorum cedentes, se eis omnes submittunt, ac dedunt. Itaque virtutem tam militum nostrorum, quàm hostium procaciam experiri noluiisti; ut nimirum posteri majorem ex eo laudem & immortalitatis gloriam Tibi deferrent. Commissariorum nostrorum, quos delegisti, præcipua cura in tractandis Suecorum animis tunc elucebat, in quibus nihil deerat, vel ad Reipub. dignita-



dignitatem tuendam, vel ad commodum ejus propagandum. Tempus tamen præfixum cum effluxisset, nihilque certi conclusum fuisset, ad pugnam iterum exercitus Tuus animum & manus disponebat. Mora enim Tibi molesta erat, & nisi ad æquiores conditiones descendissent, campi cruentati, utriusque partis collisione serò interitum civium deplorassent. Idcirco pertinaciam illorum, vel potius morum austeritatem, humanitate atque clementiâ mitigare maluisti, quàm apud posteros, incorruptos actionum nostrarum æstimatores, malè audire. Diuturno tempore deliberaſti, an conditiones, quæ Majestati Tuæ commendabantur, approbares, an eas subscriberes, quas tam Mediatores Principum externorum, quàm Commissarij & nostri, & hostium constituissent. Vicit tamen publica utilitas, vicit patriæ caritas, vicit civium incolumitas. Approbaſti, subscripsisti, consensisti in conditiones viginti sex annis (quibus utinam Te Regem nostrum clementissimum, florentem semper ac incolumem cū felici ad ulteriores quam plurimos progressu conspiciamus) duraturas. Quæ exultatio, quod gaudium, cū Prusis, tum universæ patriæ tunc fuerit; vix audeo commemorare; ne dum commemoro, aliquid potius omittam, quàm perfectè munus id adimpleam. Etenim exultant templa, quæ superiorum temporum injuriâ ab hoste spoliata ac profanata fuerunt; jam ad nitorem, & cultum veterem redibunt: quod Tibi beneficium immortalis Deus remunerabit. Lætantur artes liberales, quibus erudiri, ut ingenia ad magnæ fortunæ cultum excitentur, præclarum est, & quæ jam prostratæ ac derelictæ videbantur; Tibi decus suum & immortalitatem donabunt. Rident prata, quæ arida, conculcata, desertaque jacebant;



nunc ad pristinum vigorem ac florem restituta, Te omni ubertate ac felicitate beabunt. Triumphant agricolæ, qui, cum labor & sudor eorum infestissimo belli tempore inutilis esset, ab agro ad militiam, ab aratro ad gladium, à stiva ad hastam compulsi coactique erant: modo culturam suam Tibi consecrabunt, ut maturos & copiosos fructus è terra congregare valeas. Gaudent ad extremum omnes omnium ordinum homines, quibus tranquillitatem, ocium, pacem peperisti: Tuo nomini, pro tanta in se benignitate ac clementia, æternitatem vovent ac optabunt. Quid jam ulterius prosequar? quid majus recenseam? Magnitudo ubi jam supremitatem & fastigium ultimum attigit, suâ tandem mole deprimitur, & parvis momentis libramentisque ad eum terminum, unde initium duxit, regreditur. Verum hoc in Te Politicorum effatum cadere non potest. Fortuna, vel potius, ut Christiano more loquar, immensus ille & æternus Deus, Te, ubi ad summa perduxit, iisdem terminis & gradibus consistere vult. Hanc Tuæ excelsæ menti inspiravit prudentiam, ut Te in adversis & prosperis semper eundem præstes. Non elatus, nec depressus, eodem tramite incedis; quod sanè regium est. Quanquam felicissimo hoc tempore, quo gubernacula Regni moderaris, quid unquam adversi accidit? Clades quidem parvæ, quod fieri, amat in bellis, advenerant, non tamen Tuum animum depresserant, qui invictus, ad utramque fortunam, paratusque esse solet. Magna plerumque imperia, magnas difficultates habent: & plurimis periculis, fortunæque jactationibus expositi illi sunt, qui onus illud, humeris suis aliquando impar, suscipiunt. Non enim stultam fiduciam per-

mansuræ



mansuræ in ævum potentia deponunt; non discunt mobilia esse, quæ dedit casus, majoreque cursu ea fugere, quàm veniunt; nec his portionibus, quibus ad summa perventum est, retro iri, sæpe inter fortunam maximam & ultimam nihil interesse. Non considerant, immodica nunquam regi posse, nec diu durare, quicquid regi non potest. Hinc evenit, ut ejus solius rei inopiâ laborent magna fastigia, & id unum omnia possidentibus desit, quod aut cupiditatis sitim non extinguant, aut hominem inter mendacia torpentem, ipsaque consuetudine, blanda pro rectis, falsa pro veris proferentem, audiant. Quæ Tu REX Invictæ omnia pro ingenij Tui sagacitate, ac recto mentis judicio, despicias & contemnis. Non plus appetis, quàm ferre potes; non tam hominum suavissimè blandientium obtemperas consilio, quàm eruditissimorum virorum & de Repub. benè meritorem authoritati inniteris. In dubijs, in adversis, in lætis sapienter Te geris, ut nimirum dubia prudenter tractes, adversa fortiter feras, læta moderatè administres. Hoc Regno nostro divinitus datum est; ut talem Te Principem nancisceremur, qui hostes, & Te ipsum vincere, ( quæ victoria præstantior est ) ac domare scias; qui non proprium commodum, sed publicam utilitatem spectes; qui civium salute, Tuam contineri credas. Nec aliud gens libertati assueta à Tua majestate expectabat, nisi ut illam defenderes, quæ objectu pectorum suorum à Te periculum omne, parata esset propulsare, ut illam præsidio Tuo ac consilio fulcires, quam liberam esse, gratuito animo gloriaris.

Pro tantis itaque beneficijs Christianæ Reipub.  
præsti-



præstitis, REX INCLITE, Tibi orbis universus, quod consuevit facere Regibus ac Principibus benè de se meritis M A G N I cognomen, summo cum consensu & applausu defert. M A G N U S enim es, qui Pompejum Magnum victoriis & triumphis æquasti. M A G N U S es, qui Alexandrum Magnum liberalitate, clementiâ, dexteritate in bellis administrandis vicisti; M A G N U S es, qui Cazimirum Magnum, prædecessorem Tuum, amore in cives, benevolentia in externos, fortitudine in hostes, longo intervallo post Te reliquisti; M A G N U S es, qui Boleslaum Chrabri fortunâ, & Divinâ mente adæquasti. Quid ni dicam superasti? Limites ille Poloniæ distinxit ac separavit ab aliis regionibus ferreis columnis: Tu hisce non contentus, adjecisti Severiensem, Czernechoviensem, Novogrodensem Ducatus, ut ad fortunam Divorum antecessorum Tuorum, Tuam quoque adjicerès, ut exemplo hoc posteros ad immortalitatis gloriam invitares. Ille factis gloriæque suæ, quodammodo terminum constituit; Tu ad majora erigens animum, non nisi gravi laceratus injuriâ, patriam & nominis celebritate, & opum magnitudine promovere proposuisti. Præclarum erat Moscum ferociter viribus suis confidentem, ad reverentiam nominis sui compellere: præclarius Turcam minaciter & crudeliter, infesta signa Poloniæ inferentem, reprimere, ejusque conatus retardare ac evertere: præclarissimum verò, Suecos sine sanguinis effusione, sine dimicatione, ad pacem inclinatos, placare, & patriæ multis calamitatibus & cladibus fractæ, succurrere. Superest V L A D I S L A E M A G N E, ut eam pacem, quam



quam universo Regno conciliasti; justitiâ ac prudentiâ, quæ Tibi virtutes innatæ sunt, clariorem efficias; ut non minus in Toga Te præstantem, quam in Sago invictum, sera posteritas ammiratur, & concelebret.

D I X I.





quam universis Regno conciliasti; iustitiam ac piam  
 deus, que Tibi virtutes innatae sunt, claustrum est  
 fides, ut non minus in Toga Te praestantes, quam  
 in Sago invictum, sed potentes adm-  
 nistras, & concederet.

D I X I









